

三
國
志
注
補

三國志注補卷三

仁和趙一清誤

魏書三

明帝紀第三

注魏末傳曰

隋書經籍志魏末傳二卷梁又有魏末傳并魏氏大事三卷
亡

七年夏五月帝病篤乃立爲皇太子丁巳卽皇帝位大赦

晉書天文志黃初四年十一月暈北斗占曰有大喪赦天下
七年五月帝崩明帝卽位大赦天下

辛巳立皇子同爲清河王

問諸王傳作貢

十二月以太尉鍾繇爲太傅

晉書職官志太宰太傅太保周之三公官也魏初唯置太傅末年又置太保

太和元年

宋書禮志魏明帝初司空王朗議古者有年數無年號漢初然或有世而改有中元後元元改彌數中後之號不足故更假取美名非古也述春秋之事曰隱公元年則簡而易知載漢世之事曰建元元年則後不見宜若古稱元而已明帝不從乃詔曰先帝卽位之元則有延康之號受禪之初亦有黃初之稱今名年可也於是尙書奏易曰乾道變化各正性命

休合太和乃利貞首出庶物萬國咸寧宜爲太和元年

春正月郊祀武皇帝以配天宗祀文皇帝於明堂以配上帝

晉書禮志太和元年始宗祀文帝於明堂齊王亦行其禮今齊王志不書

二月辛未帝耕於藉田

宋書禮志魏三祖皆親耕藉百官志藉田令一人丞一人漢文帝置東京及魏並不置晉書禮志魏氏雖天子耕藉藩鎮闕諸侯百畝之禮

夏四月乙亥行五銖錢

通典卷八黃初二年罷五銖錢使百姓以穀帛爲市買至明帝代錢廢穀用既久人間巧僞漸多競湮穀以要利作薄絹

以爲市雖處以嚴刑而不能禁也司馬芝等舉朝大議以爲用錢非徒豐國亦所以省刑今若更鑄五銖於是爲便帝乃更立五銖錢

秋八月

晉書五行志太和元年秋數大雨多暴卒雷電非常至殺鳥雀此恆雨之罰也

新城太守孟達反

新城郡續郡國志引魏氏春秋建安二十五年分南郡之巫秭歸夷陵臨沮並房陵上庸西城七縣置蜀志劉封傳以爲合房陵上庸西城三郡爲新城郡以達爲太守又西城郡建安二十年立置太守分錫上庸郡置都尉而劉封傳房陵太

守蒯祺上庸太守申耽祺爲孟達所殺耽降蜀或云房陵郡劉表置上庸亦析爲郡其年月不可得而詳已達降魏始并爲新城一郡然是時申耽在蜀仍爲上庸太守其弟申儀爲西城太守是二郡未嘗與新城合也至耽儀又叛蜀降魏耽見廢而儀爲魏興太守則改西城爲魏興而上庸如故是以晉志三郡並列達本蜀之宜都太守故以爲分南郡之巫秭歸夷陵臨沮四縣皆蜀宜都屬後入吳魏不得其土而遙奪其名新城治房陵卽蒯祺所爲之郡也

詔驃騎將軍司馬宣王討之

宋書百官志魚豢曰魏世驃騎爲都督儀與四征同若不爲都督雖持節屬四征者與前後左右雜號將軍同其或散還

從文官之例則位次三司

注又王近出乘小輦

晉書輿服志輦自漢以來爲人君之乘魏晉御小輦出卽乘之

注魏興太守申儀與達有隙密表達與蜀潛通帝未之信也司馬宣王遣參軍梁幾察之又勸其入朝達驚懼遂反

晉書宣帝紀孟達之降也魏朝遇之甚厚帝以達言行傾巧不可任驟諫不見聽乃以達領新城太守封侯假節達於是連吳固蜀潛圖中國蜀諸葛亮惡其反覆又慮其爲患達與申儀有隙亮欲促其事乃遣郭模詐降過儀因漏泄其謀達聞其謀漏泄將舉兵帝恐達速發以書喻之曰將軍昔棄劉

備託身國家國家委將軍以疆場之任任將軍以圖蜀之事
可謂心貫白日蜀人愚智莫不切齒於將軍諸葛亮欲相破
惟苦無路耳模之所言非小事也亮豈輕之而令宣露此殆
易知耳達得書大喜猶與不決帝乃潛軍進討諸將言達與
二賊交構宜觀望而後動帝曰達無信義此其相疑之時也
當及其未定促決之乃倍道兼行八日到其城下吳蜀各遣
其將向西城安橋木關塞以救達帝分諸將以距之初達與
亮書曰宛去洛八百里去吾一千二百里間吾舉事當表上
天子比相反覆一月間也則吾城已固諸軍足辦則吾所在
深險司馬懿必不自來諸將來吾無患矣及兵到達又告亮
曰吾舉事八日而兵至城下何其神速也御覽卷三百五十

九司馬彪戰略曰太和元年諸葛亮從成都到漢中達又欲應亮遺亮玉玦織障汗蘇合香亮使郭模詐降過魏興太守申儀與達有隙模語儀亮言玉玦者已決織成者言謀已成蘇合者言事已合上庸城三面阻水達於城外爲木柵以自固帝度水破其柵直造城下八道攻之旬有六日達甥鄧賢將李輔等開門出降斬達首傳京師俘獲萬餘人振旅還於宛又徙達餘眾七千餘家於幽州

注于寶晉紀曰達初入新城登白馬塞歎曰劉封申耽據金城千里而失之乎

堵水自上粉縣北流注之酈道元注云有白馬山山石似馬望之逼真側水謂之白馬寨孟達爲守登之而歎爲上堵吟

音韻哀切有惻人心又曰漢水右對月谷口山有坂月川於中黃壤沃衍而桑麻列植佳饒水田故孟達與諸葛書善其川土沃美也隋書經籍志有孟達集三卷

分新城之上庸武靈巫縣爲上庸郡錫縣爲錫郡

靈乃陵之譌漢書地理志南郡有巫漢中郡有上庸武陵續郡國志無武陵蓋廢省矣此有疑復置晉書地理志上庸郡統北巫蓋與吳建平羣之巫縣對立也漢書地理志錫縣屬漢中

右將軍張郃

宋書百官志左右前後將軍周末官秦漢並因之光武建武七年省魏以來復置

擊亮於街亭

方輿紀要卷五十九街泉城在陝西秦州秦安縣東北漢置縣屬天水郡後漢省入略陽縣杜佑曰隴城縣有街泉亭卽馬謖敗處

注劉升之兄弟守空城而已

後主傳字公嗣此云劉升之豈別字邪又後主小名阿斗與升之字亦合

注高定青羌

高定越嶲夷王也青羌青衣羌也

注共受塗炭

共一作同

秋九月曹休率諸軍至皖與吳將陸議戰於石亭敗績

續郡國志廬江郡皖方輿紀要卷二十六石亭在安慶府東北皖城在府西北一清案晉書宣帝紀帝朝於京師天子問二虜宜討何者爲先對曰吳以中國不習水戰故敢散居東關凡攻敵者必扼其喉而椿其心夏口東關賊之心喉若爲陸軍以向皖城引權東下爲水戰軍向夏口乘其虛而擊之此神兵從天而墜破之必矣蓋時怵於硤石之敗故魏之君臣所以謀吳者甚急仲達之言極中切要然亦以孔明尙在未敢議蜀兵家所謂知彼知己者也

十二月諸葛亮圍陳倉

寰宇記卷三十陳倉故城在鳳翔府寶雞縣東二十里上下

二城相連上城是秦文公築下城是郝昭築方輿紀要卷五十五石鼻城在寶雞縣東北三十里諸葛武侯所築水經注汧水對城武侯與郝昭相禦處也俗謂之石鼻寨亦曰靈壁又爲石壁祝穆曰石鼻寨行人自北入蜀者至此漸入山自蜀趨洛者至此漸出山故蘇軾詩云北客初來試新險蜀人從此送殘山也

注爲雜號將軍

宋書百官志雜號將軍凡四十號

注亮圍陳倉使昭鄉人靳詳於城外遙說之昭於樓上應詳曰魏家科法卿所練也我之爲人卿所知也我受國恩多而門戶重卿無可言者但有必死耳卿還謝諸葛便可攻也

寰宇記卷三十引魏略曰太和中魏遣將軍郝昭築陳倉城
適訖會諸葛亮來攻亮本聞陳倉城惡及至怪其整頓聞知
昭在其中大驚愕亮素聞昭在西有威名念攻之不易初太
原斬詳少與昭相親後爲蜀所得及亮陳倉詳爲亮監軍使
於城外呼昭喻之昭於樓上應詳曰魏家科法卿所練也我
之爲人卿所知也曩時高剛守祁山坐不專意雖終得全於
今謂議不止我必死矣卿還謝諸葛亮便可攻也

注亮乃更爲井闌百尺以射城中以土瓦填塹

何云宋本瓦作丸

戊申追尊高祖大長秋曰高皇帝夫人吳氏曰高皇后

何云與其追尊曹騰自實其爲贅闕乞養不如丕之殺於禮

三國志注卷三
矣此自爲報不能生子而以加隆所後之親爲後來勸與下
七月詔書連類而觀可以得其情矣

而董宏等稱引亡秦或誤時朝

宋書禮志時朝作朝議

謂考爲皇稱妣爲后則股肱大臣誅之無赦其書之金策藏之
宗廟著於令典

何云繼統之說魏明尙知之何後人之紛紛也稱皇不已而
稱宗稱宗不已而耐享太廟蔑禮瀆倫甚矣

冬十月改平望觀曰聽訟觀

方輿紀要四十八平望觀在故洛城華林園東南天淵池水
逕其南魏所置也

使太常韓暨持節迎高皇帝太皇帝武帝文帝神主於鄴

宋書禮志尙有行太廟宗正曹恪與暨偕行

注今此無高祖神主蓋以親盡毀也

宋書禮志洛京廟成則以親盡遷處士主置園邑使令丞奉薦所謂處士卽曹節也

戊子詔太傅三公以文帝典論刻石立於廟門之外

隋書經籍志典論五卷魏文帝撰

遼東太守公孫淵爲車騎將軍

淵傳是拜揚烈將軍宋書百官志揚烈將軍建安中以假公孫淵亦非也蓋誤以太和爲建安耳

八月辛巳行東巡遣使者以特牛祠中嶽

宋書禮志魏文帝值參分初創方隅事多皇輿亟動略無寧歲蓋應時之務非舊章也明帝凡三東巡所過存問高年恤人疾苦或賜穀帛有古巡幸之風焉一清案此所祠中嶽是太室山

注使執金吾臧霸行太尉事

漢書百官公卿表執金吾秩中二千石續百官志執金吾一人中二千石本注曰掌官外戒司非常水火之事月三繞行宮外及主兵器吾猶禦也

九月大雨伊洛河漢水溢詔眞等班師

晉書宣帝紀帝自西城斫山開道水陸並進沂沔而上至於胸臆拔其新豐縣軍次丹口遇雨班師

十一月太白犯歲星

宋書天文志太和四年十一月壬戌太白犯歲星占曰有大兵五年諸葛亮以大眾寇天下

五年春正月

水經穀水注河有十二縣境簿曰河南縣城東十五里有千金塢洛陽記曰千金塢舊堰穀水魏時更修此堰謂之千金塢積石爲塢而開溝渠五所謂之五龍渠渠上立塢塢之東首立一石人石人腹上刻勒云太和五年二月八日庚戌造築此塢更開溝渠此水衝渠止其水助其堅也必經年厯世是故部立石人以記之云爾蓋魏明帝修王張故績也塢是都水使者陳協所造一清案王梁張純始爲此渠故云修王

張故續

復置護匈奴中郎將

續百官志使匈奴中郎將一人比二千石本注曰主護南單于

其令諸王及宗室公侯各將適子一人朝

晉書禮志魏制藩王不得朝觀明帝時有朝者皆由特恩不得以爲常

申明著於令

令字一本作今字

十一月乙酉月犯軒轅大星

宋書天文志占曰女主憂太和五年十二月甲辰月犯鎮星

占曰女主當之六年三月乙亥月又犯軒轅大星青龍二年十月乙丑月又犯鎮星三年正月太后郭氏崩

戊戌晦日有蝕之

晉書天文志太和初太史令許芝奏曰應蝕與太尉於靈星祈禱帝曰蓋聞人主政有不德則天懼之以災異所以譴告使得自修也故日月薄蝕明治道有不當者朕卽位以來旣不能光明先帝聖德而施化有不合於皇神故上天有以寤之宜敕政自修有以報於神明天之於人猶父之於子未有父欲有責其子而可獻盛饌以求免也今外欲遣上公與太史令俱禱之於義未聞也羣公卿士大夫其各勉修厥職有可以補朕不逮者各封上之

十二月甲辰月犯鎮星戊午太尉華歆薨

晉書天文志太和五年五月熒惑犯房占曰將相有憂其七月車騎將軍張郃追諸葛亮爲亮所害十二月太尉華歆薨六年春

晉書天文志六年正月戊辰朔日有蝕之見吳祿又鼎錄太和六年鑄一鼎三足名曰萬壽鼎小篆書

秋七月以衛尉董昭爲司徒

續百官志衛尉秩中二千石

九月行幸摩陂治許昌宮起景福承光殿

水經洧水注許昌城內有景福殿基魏太和中造準價八百餘萬文選何晏景福殿賦注引洛陽宮殿簿曰景福殿七間

承光殿七間何晏賦所謂立景福之祕殿於南則有承光前殿賦政之宮也

冬十月殄夷將軍田豫

宋書百官志四十雜號無殄夷之名蓋一時之制

十一月丙寅太白晝見

宋書天文志十一月丙寅太白晝見南斗遂厯八十餘日恆見占曰吳有兵明年孫權遣張彌等將兵萬人錫授公孫淵爲燕王淵斬彌等虜其眾晉志同

有星孛於翼近太微上將星

宋書天文志占曰爲兵喪甘氏曰孛所當之國是受其殃翼又楚分孫權封略也明年權有遼東之敗又明年諸葛亮

入秦川孫權圍新城以應亮帝自東征權太和元年十一月
陳王植薨青龍元年夏北海王薨薨三年正月太后郭氏崩
青龍元年

晉書宣帝紀青龍元年穿成國渠築臨晉陂溉田數千頃國
以充實焉一清案成國渠衛臻所修治而臻傳不載見水經
渭水下注

青龍見邾之摩陂井中

方輿紀要卷五十一漢置邾縣屬潁川郡後漢省魏復置
二月丁酉幸摩陂觀龍於是改年

宋書符瑞志明帝詔畫工圖寫龍潛而不見五行志云凡瑞
興非時則爲妖孽况困於井非嘉祥矣魏以改年非也晉武

不賀是也魏世龍莫不在井此居上者逼制之應

夏五月壬申

御覽卷九百八十六載繆襲神芝讚曰青龍元年五月庚辰神芝生於長平之習陽其色紫丹其質光輝高尺八寸五分散爲三十六莖枝幹連屬有似珊瑚之形詔御府匱而藏之具畫其形

注於是以惇等配饗之

何云之字疑衍

并州刺史畢軌表輒出軍

晉書地理志并州統郡六曰太原上黨西河雁門樂平新興軌以進軍屯陰館

續郡國志雁門郡陰館注曰句注山在陰館

二將沒

何云沒上當有敗字

注關羽屢請於太祖求以杜氏爲妻太祖疑其有色及城陷太祖見之乃自納之

此裴世期所謂底下之書何足據乎孟德自取其妻乃欲以之誣汗賢者哉

注世語曰朗子秀勁厲能直言爲晉武帝博士

晉書秀傳字元良少敦學行以忠直知名咸寧中爲博士前後垂二十年卒於官

注奴云霍顯光後小妻明友妻光前妻女

博物志漢末發范明友冢奴猶活明友霍光女習說光家事廢立之際多與漢書相似此奴常遊走於民間無止住處今不知所在或云尙在余聞之於人可信而目不可見也又何云光前妻東閭氏

二年春二月乙未太白犯熒惑

宋書天文志占曰有大兵起有大戰是年四月諸葛亮據渭南吳亦起兵應之魏東西奔命晉志同

其減鞭杖之制著於令

晉書刑法志明帝改士庶罰金之令男聽以罰金婦人如笞還從鞭督之例以其形體裸露也

夏四月大疫崇華殿災

晉書天文志三月辛卯月犯輿鬼輿鬼主斬殺占曰人多病國有憂又曰大臣憂是年夏及冬大疫四年五月司徒董昭薨又五行志曰崇華殿災延於南閣繕復之

注八月壬申葬於山陽國陵曰禪陵置園邑葬之日帝制錫衰弁經哭之慟適孫桂氏鄉侯康嗣立爲山陽公

後漢書獻帝紀注帝王紀曰禪陵在濁鹿城西北十里在今懷州修武縣北二十五里陵高二丈周迴二百步劉澄之地記云以漢禪魏故名焉一清案晉書武帝紀秦始二年十一月罷山陽國督軍除其禁制益曹氏之防範如此然猶未加弑逆之事又泰始四年二月庚子增置山陽公國相郎中合陵令雜工宰人鼓吹車馬各有差太康六年九月景子山陽

公劉康薨

五月太白晝見孫權入居巢湖口向合肥新城又遣將陸議孫韶各將萬餘人入淮沔

晉書天文志五月丁亥太白晝見積三十餘日以晷度推之非秦魏卽荆楚也是時諸葛亮據渭南與相持孫權寇合肥又遣陸議孫韶等人淮沔天子親東征蜀本秦地則爲秦及楚兵悉起應占方輿紀要卷二十六居巢湖在南直廬州府東五十里亦曰巢湖亦曰藻湖周四百餘里占合肥舒城廬江巢四縣之境以港大小三百六十納諸水而注之江爲淮西亘浸一清案淮沔之淮本作睢亦作沮卽相中也

秋七月壬寅

宋書天文志七月己巳月犯樞閣占曰天子崩又爲火災三年七月崇華殿災景初三年正月明帝崩一清案晉志亦作七月己巳疑壬寅誤

大將軍以制之

以上疑落足字

亮數挑戰宣王堅壘不應

寰宇記卷三十云三交故城在鳳翔府寶雞縣西四十六里者舊傳司馬宣王與諸葛亮相拒於此因築此城

冬十月乙丑月犯鎮星及軒轅戊寅月犯太白

宋書天文志占曰人君死又爲兵景初元年七月公孫淵叛二年正月遣司馬懿討之三年正月明帝崩

十二月詔有司刪定大辟城死罪

困學紀聞攷史云律章句馬鄭諸儒十有餘家魏明帝詔但用鄭氏章句范蜀公曰律之例有八以准皆各其及卽若若春秋之凡宋荅公曰應從而遠堪供而闕此六經之亞文也已亥復置朔方郡

續郡國志朔方郡六城臨戎三封朔方沃野廣牧大城故屬西河一清案建安二十年省朔方郡而此復置之然晉書地理志無之蓋旋置而旋廢耳

注魏略曰是年起太極諸殿

御覽卷一百七十五引魏略曰有卻非殿銅馬殿敬法殿清涼殿鳳凰殿嘉德殿黃龍殿壽安殿行殿又引山謙之丹陽

記秦皇改命宮爲廟以擬太極魏號正殿爲太極蓋采其義而加以太也水經穀水注明帝上法太極於洛陽南宮起太極殿於漢崇德殿之故處改雉門爲閭闔門

注又於芳林園中起陂池楫棹越歌

寰宇記卷三引魏書云明帝於宮西鑿濠池池以通御溝義取日入濠汜以爲名水經穀水注穀水入華林園麻疏園南園中有古玉井井悉以珉玉爲之以緇石爲口工作精密猶不變古燥焉如新又逕瑤華宮南麻景陽山北山有都亭堂上結方湖湖中起御坐石也御坐前建蓬萊山曲池接筵飛沼拂席南面射侯夾席武峙背山堂上則石路崎嶇巖嶂峻險雲臺風觀縷帶阜遊觀者升降阿閣出入虹陞望之狀

鳧沒鸞舉矣其中引水飛泉傾瀾瀑布或在渚聲瀉潺潺不
斷竹柏蔭於層石繡薄叢於泉側微巖暫拂則芳溢於六空
實爲神居矣晉書食貨志明帝不恭淫於宮樂百寮編於手
役天下失其躬稼此後關東遇水民亡產業而興師遼陽坐
甲江甸皆以國乏經用胡可勝言

注通引穀水過九龍前

寔字記卷三引魏略九龍下有祠字

注爲玉井綺欄

寔字記卷三引洛陽記云璇華宮有玉井皆以白玉壘飾是
也

注使博士馬均作司南軍

軍乃車字之譌杜襲傳注均作鈞司南車作指南車晉興康志司南車一名指南車

注太子舍人張茂

續百官志太子舍人二百石一清案宋志謂魏世無東宮此太子舍人蓋虛置也

注茂字彥林沛人

晉書刑法志衛覬奏獄吏劉象受屬偏攻囚張茂物故豈卽其人邪

秋七月

晉書天文志六月丁未填星犯井鉞戊戌太白又犯之占曰凡月五星犯井鉞悉爲兵災一曰斧鉞用大臣誅七月己丑

填星犯東井距星占曰填星入井大人憂行近距爲行陰其占曰大水五穀不成景初元年夏大水傷五穀

王中太白晝見

晉書天文志太白晝見在尾麻二百餘日恆晝見占曰尾爲燕有兵

十一月丁酉

晉書天文志十二月戊辰月犯鉤鈴占曰王者憂

注魏氏春秋曰是歲張掖郡刪丹縣金山

方輿紀要卷六十三金山在陝西永昌衛北二里漢番和縣地刪丹廢縣今山丹衛治山本屬山丹蓋互於兩縣間也

注玄川溢涌寶石負圖狀象靈龜廣一丈六尺長一丈七尺一

寸圍五丈八寸立於川西有石馬七

何云馬有七其宣景文武惠懷愍之祥乎一情案宋書符瑞志作石馬十二與此不同其餘文亦稍異又隋書經籍志高堂隆孟康俱有張掖郡立石圖一卷

注大金馬一匹在中大告

告乃吉字之譌

注及魏之初興也張掖之柳谷有開石

石下一本有焉字因學紀聞云書宅西曰昧谷虞翻謂當爲柳谷魏明帝時張掖柳谷口水溢涌寶石負圖卽其地也方輿紀要卷六十三大柳谷在甘州衛東南百里與山丹衛接壤隋志張掖縣有大柳谷張掖廢縣卽今衛治漢爲麟得縣

注漢晉春秋曰氏池縣大柳谷口

漢書地理志張掖郡氏池方輿紀要氏池城在甘州衛東

注白石書之爲十三馬

宋書符瑞志作十二

注至晉初其文愈明馬象皆煥徹如玉焉

拾遺記魏明帝時泰山下有連理文石高十二丈狀如栢樹
其文彪發如人雕鏤自下及上皆合而中開廣五尺望若真
樹也父老云當秦末二石相去百餘步蕪沒無有蹊徑及魏
帝之始稍覺相近如雙闕土王陰類魏爲土德斯爲靈徵
四年

晉書天文志四年閏正月己巳填星犯井鉞三月癸卯填星

犯東井己巳太白與月相異晝見五月壬寅太白犯畢左股
第一星占曰畢爲邊兵又主刑罰九月涼州塞外胡阿畢師
使侵犯諸國西域校尉張就討之斬首捕虜萬計
其布告天下使明朕意

是時承用秦漢舊律錯糅無常於是下詔但用鄭氏章句又
下詔改定刑制命司空陳羣散騎常侍劉邵給事黃門侍郎
韓遜議郎庾綏中郎黃休荀詵等刪約舊科傷采漢律定爲
魏法制新律十八篇州郡令四十五篇尙書官令軍中令百
八十餘篇詳晉書刑法志

甲寅太白犯軒轅大星

晉書天文志占曰女主憂景初元年皇后毛氏崩

甲申有星孛於大辰乙酉又孛於東方十一月己亥彗星見犯
宦者天紀星

晉書天文志占曰大辰爲天王天下有喪宦者在天市爲中
外有兵天紀爲地震孛彗主兵喪

景初元年春正月壬辰

晉書天文志二月乙酉月犯房第二星占曰將軍有憂其七
月司徒陳矯薨二年四月司徒韓暨薨

山在縣言黃龍見

方輿紀要卷三十一山在城在山東濟南府長青縣東三十
里漢在縣屬泰山郡後漢因之晉爲山在縣一清案此稱山
在縣則山在乃魏所改也

改太和厤曰景初厤

何云景初厤尙書郎楊偉所造詳宋書厤志曹爽有參軍楊偉疑卽斯人宋書又載黃初中太史丞韓翊嘗造黃初厤時陳羣爲尙書令奏以爲是非得失當以一年決定今注家於羣傳遺之楊偉厤施用逮於晉宋而名字翳然亦采掇之闕略也一清案明帝改正朔事詳宋禮志

六月戊申京都地震

宋書天文志九月吳將朱然圍江夏皇后毛氏崩二年正月討公孫淵三年正月明帝崩

己亥以尙書令陳矯爲司徒尙書左僕射衛臻爲司空

據臻本傳及宋書百官志左當作右宋書百官志漢獻帝建

安四年以執金吾榮邵爲尙書左僕射衛臻爲右僕射二僕
分置自茲始一清案榮衛先後不同時榮曾爲左僕射衛曾
爲右僕射史家引以爲證則可以爲二人分任則謬也續百
官志注云獻帝分置左右僕射以榮邵爲左僕射則不與衛
同時分任可知注又引獻帝起居注曰邵卒官贈執金吾亦
非由執金吾爲左僕射休文誤矣晉書職官志云魏晉省置
無恆置二則爲左右僕射或不兩置但曰尙書僕射

丁未分魏興之魏陽錫郡之安富上庸爲上庸郡省錫郡以錫
縣屬魏興郡

文帝改廣陵爲魏陽此當是魏昌之譌水經沔水注魏昌縣
以黃初中分房陵立案宋州郡志新城郡昌魏今魏立即魏

昌也方輿紀要卷七十九昌魏城在湖廣鄖陽府房縣西南
安富未詳當亦是魏所置水經潁水注潁水東南流會富水
豈取此以名縣歟

有司奏武皇帝撥亂反正爲魏太祖樂用武始之舞文皇帝應
天受命爲魏高祖樂用成熙之舞帝制作興治爲魏烈祖樂用
章武之舞

事詳宋書樂志又志載公卿奏三舞宜有總名可名大鈞之
樂言大魏三世同功以至隆平也章武之舞志作章斌之舞
此武字誤

九月冀充徐豫四州民遇水遣侍御史循行沒溺死亡及失財
產者在所開倉賑救之

晉書五行志九月淫雨過常冀充徐豫四州水出沒溺殺人漂失財產帝自初卽位便淫奢極欲多占幼女或奪士妻崇飾宮室妨害農戰觸情恣欲至是彌甚號令逆時饑不損逆此水不潤下之應也續百官志侍御史十五人六百石掌察舉非法受公卿羣吏奏事有違失者舉劾之

冬十月丁未月犯熒惑

宋書天文志占曰貴人死二年四月司徒韓暨薨八月公孫淵滅

乙卯營洛陽南委粟山爲圖丘

續郡國志注引魏氏春秋曰雒陽有委粟山在陰鄉魏時營爲圖丘寰宇記卷三委粟山在洛陽縣東南二十五里

注多不見經是以制度無常

宋書禮志作多不經見並以興廢無常晉志同

十二月壬子冬至始祀

宋書禮志自正始以後終魏世不復郊祀

分襄陽郡之郡葉縣屬義陽郡

漢書地理志南郡領襄陽臨沮宜城邵若續郡國志南郡領襄陽臨沮宜城郡又南陽領葉皆漢舊縣也惟旃陽不見當是魏置隋志梁有旃陽縣後改名惠懷在宜城縣境或因魏舊名又方輿紀要卷七十九晉平吳割中廬之南鄉臨沮之北鄉置上黃縣治軫鄉或亦旃陽之舊地旃軫字相近又方輿紀要卷五十義陽城在河南信陽州南四十里漢南陽郡

平氏縣之義陽鄉也魏文帝置義陽縣屬義陽郡

注魏略曰是歲徙長安諸鐘簠駝銅人承露盤盤折銅人重不可致畱於霸城大發銅鑄作銅人二號曰翁仲列坐於司馬門外

水經穀水注銅駝街明帝置銅駝諸獸於閭闔南街陸機曰駝高九尺寰宇記卷三引洛陽記云漢鑄銅駝二枚在宮南四會道頭夾路相對俗語曰金馬門外聚羣賢銅駝陌上集少年言人物之盛也晉書五行志長人見爲國亡長狄見臨洮爲秦亡之禍始皇不悟反以爲嘉祥鑄銅人以象之魏法亡國之器而於義竟無取焉蓋服妖也一清案何平叔景福殿賦建凌雲之層盤注凌雲層盤名爲之以承甘露是魏人

又自作承露仙人掌也

注樹松竹雜木善草於其上

拾遺記魏明時苑中合歡草狀如蓍一株百莖晝則眾條扶疏夜乃合作一莖謂之神草

注漢晉春秋曰帝徙盤盤折聲聞數十里金狄或泣

金狄泣者輒死魏亡之妖也

二年春正月詔太尉司馬宣王帥眾討遼東

晉書宣帝紀景初二年帥牛金胡遵等步騎四萬發自京師車駕送出西明門詔弟孚子師送過溫賜以穀帛牛酒敕郡守典農以下皆往命焉又禮志漢魏故事遣將出征符節郎授節鉞於朝堂一清案魏之軍旅皆人主自行此爲遣將專

征之始

注干寶晉紀曰帝問宣王度淵將何計以待君

一本度上有卿字

注魏名臣奏載散騎常侍何曾表曰臣聞先王制法必於全慎

晉何曾傳作必全於慎

注隕缺不預則手足相代

曾傳手作才

注今懿奉辭誅罪

曾傳誅罪下有精甲銳鋒四字

注消散日月

曾傳散作引

注名位不殊素無定分

曾傳定分下有統御之尊四字

注宜選大臣名將威重宿著者盛其禮秩遣詣懿軍進同謀略退爲副佐雖有萬一不虞之災軍主有儲則無患矣

何云當是亦疑懿權重故須置貳以參之觀孔明沒而軍幾亂穎攷置副之議蓋老謀也

壬寅分沛國蕭相竹邑符離蘄龍亢山桑浹虹十縣爲汝陰郡宋縣陳郡苦縣皆屬譙郡

漢書地理志山桑屬沛續邵國志屬汝南蓋魏時仍改屬沛國又郡國志宋縣亦屬汝南又地理志虹作瑯莽曰貢師古亦音貢又郡國志作虹案後亦曰絳城陳大建五年吳明徹

克淮南絳城來降卽此又郡國志汝南汝陰縣故胡國

以沛杼秋公丘彭城豐國廣戚並五縣爲沛王國

續郡國志豐屬沛此云豐國亦魏改稱又廣戚屬沛彭城屬楚又皆屬彭城國

六月省漁陽郡之狐奴縣復致安樂縣

續郡國志漁陽郡領狐奴安樂縣今云復置安樂蓋縣廢於東漢之末也致當作置

癸丑有彗星見張宿

宋書天文志長三尺逆西行四十一日滅占曰爲兵喪何云其占與王莽地皇三年有星孛於張同天將除曹氏矣

注魏書曰九月蜀陰平太守廖惇反攻守善羌侯宕蕤營

宕蕡羌胡號也宕卽石宕水蕡卽蕡塏川見水經河水二注
洮水下魏書地形志洪和郡有蕡川縣此羌蓋卽地名以立
號

注雍州刺史郭淮遣廣魏太守王贊

廣魏故廣漢也蓋曹氏改名廣魏卽後漢初平四年所置永
陽郡改治臨渭方輿紀要卷五十九秦州秦安縣東南八十
里有臨渭城

丙寅司馬宣王圍公孫淵於襄平

續郡國志遼東郡治襄平

大破之傳淵首於京都海東諸郡平

晉書五行志景初二年廷尉府中雌雞化爲雄不鳴不將干

實曰是歲宣帝平遼東百姓始有與能之義此其象也然晉三后并以人臣終不鳴不將又天意也

冬十一月

晉書天文志十月癸巳客星見危逆行在離宮北騰蛇南甲辰犯宗星己酉滅占曰客星所出有兵喪虛危爲宗廟又爲墳墓客星近離宮則宮中將有大喪就先君於宗廟之象也三年正月明帝崩又十月甲午月犯箕占曰將軍死正始元年四月車騎將軍黃權薨

閏月月犯心中央大星

一歲之中月兩犯心距星三犯中央大星宋天文志太星爲天王前爲太子後爲皇子三年正月帝崩太子立卒見廢爲

齊王正始四年奏王詢薨

以武衛將軍曹爽代之

宋書百官志武衛將軍無員初魏王始置武衛中郎將文帝踐祚改爲將軍主禁旅

注漢晉春秋曰帝以燕王宇爲大將軍使與領軍將軍夏兗獻武衛將軍曹爽屯騎校尉曹肇驍騎將軍秦朗等對輔政

宋書百官志領軍將軍一人掌內軍魏武爲丞相相府自置領軍非漢官也文帝卽魏王位始置領軍主五校中壘武衛三營又驍騎將軍魏世置爲內軍有營兵高功者主之

注中書監劉放令孫資

宋書百官志魏武爲王置祕書令典尙書奏事文帝改爲中

書令又置監及通事郎

三年春正月丁亥太尉宣王還至河內帝驛馬召到引入臥內
晉書宣帝紀初帝至襄平夢天子枕其膝曰視吾面俛視有
異於常心惡之先是詔帝便道鎮關中及次白屋有詔召帝
三日之間詔書五至詔曰間側息望到到便直排閣入視吾
面帝大遽乃乘追鋒車晝夜兼行自白屋四百餘人一宿而
至又晉五行志景初中童謠曰阿云阿公駕車馬不意阿公
東渡河阿公來還當奈何及宣王平遼東歸至白屋當還鎮
長安會帝疾篤急召之乃乘追鋒車東渡河如童謠之言也
卽日帝崩於嘉福殿

晉書五行志景初末禿鶩又集芳林園池已前再至輒有大

喪帝惡之其明年帝崩又景初中洛陽城東橋城西洛水浮
橋桓楹同日三處俱時震尋又震西坡上候風木飛鳥時勞
役大起帝尋晏駕

注臣松之案魏武以建安九年八月定鄴文帝始納甄后明帝
應以十年生計至此年正月整三十四年耳時改正朔以故年
十二月爲今年正月可彊名三十五年不得三十六也

明周嬰卮林曰志稱叡封武德侯年十五時爲延康元年則
叡蓋以建安十一年生計黃初太初青龍合年十七而景初
彊爲三年凡二十年則裴云彊名三十五者良是若以爲建
安十年生則可三十六矣然以十年生又不得言十五封武
德陳裴皆爲舛也

癸丑葬高平陵

晉書禮志明帝性雖崇奢然未遽營陵其之制又齊王在位九年始一謁高平陵而曹爽誅其後遂廢終於魏世

宿松羅忠濟初校

黟縣黃士陵覆校

陽湖吳翊寅再覆校

三國志注補卷三

三國志注補卷三

三

廣雅書局藏

三國志注補卷四

魏書四

三少帝紀第四

大將軍曹爽太尉司馬宣王輔政

晉書宣帝紀齊王卽位遷侍中持節都督中外諸軍錄尚書事與爽各統兵三千人共執朝政史直殿中乘輿入殿宋書百官志黃初二年始置都督諸州軍事或領刺史三年上軍大將軍曹真都督中外諸軍事假黃鉞則總統外內諸軍矣太和四年宣帝征蜀加號大都督晉世則都督諸軍爲上監諸軍次之督諸軍爲下使持節爲上持節次之假節爲下

二月西域重鐸獻火浣布

晉書宣帝紀正始元年春正月東倭重鐸納貢焉耆危須諸國弱水以南鮮卑王名王皆遣使來獻

注異物志曰斯調國有火洲在南海中

據注所引異物志神異經則火浣布不僅西域有之後漢書南蠻傳論稱火毳卽火浣布也

注搜神記曰崑崙之墟有炎火之山

水經灊水注黃水又東注武州川右合火山西谿水水導源火山西北流山上有火井南北六七十步廣減尺許源深不見底炎勢上升常若微雷發響以草爇之則烟騰火發亦名熒臺又澁水注引齊地記云東武城東南有盧水水側有勝

火木方俗音曰櫻子其木經野火燒死炭不滅則火山火井火木亦不一處矣

注問諸長老云晉初受禪卽用魏廟

水經穀水注渠水南出逕銅駝街渠左是魏晉故廟地宋書禮志晉太始元年十二月丙寅受禪二年正月有司奏營建七廟帝重其後詔宜權立一廟於是羣臣奏議舜承堯禪受終文祖則虞氏不改唐廟因仍舊宮可依有虞故事卽用魏廟奏可七月又詔曰主者前奏就魏舊廟誠亦有準然於祇奉神明情猶未安宜更營造崇正永制於是改創其以太尉爲太傅

晉書宣帝紀爽欲使尙書奏事先由已乃言於天子徙帝爲

大司馬朝議以爲前後大司馬累薨於位乃以帝爲太傅
夏六月以遼東東沓縣吏民渡海居齊郡界以故縱城爲新沓
縣以居徙民

寰宇記卷十九淄州淄川縣有故反蹤城齊記云齊景公失
馬尋蹤遂失於此故有反蹤城一清案續郡國志遼東郡沓
氏此云東沓疑魏改

其以建寅之月爲正始元年正月以建丑月爲後十二月

宋書禮志景初三年正月帝崩齊王卽位是年十二月尙書
盧毓奏烈祖明皇帝以今年正日棄離萬國禮忌日不樂甲
乙之謂也烈祖明皇帝建丑之月棄天下臣妾之情於此正
日有甚甲乙今若以建丑正朝四方會羣臣設盛樂不合於

禮博士樂祥議正旦受朝貢羣臣奉贊後五日乃大宴會
作樂太尉屬朱誕議今因宜改之際還修舊則建寅於制爲
便大將軍屬劉肇議宜過正一日乃朝賀大會明令天下知
崩亡之日不朝也詔曰省奏五內斷絕奈何奈何烈祖明皇
帝以正日棄天下每與皇太后念此日至心有剝裂不可以
此日朝羣辟受慶賀也月二日會又非故也聽當還夏正月
雖違先帝通三統之義斯亦子孫哀慘永懷又夏正朔得天
數者其以建寅之月爲歲首

丙戌以遼東汶北豐縣民流徙渡海規齊郡之西安臨菑昌國
縣界爲新汶南豐縣以居流民

續郡國志遼東郡有汶而無北豐疑公孫氏立又齊郡領西

安臨淄昌國方輿紀要卷三十五山東青州府壽光縣西四十里有益城司馬宣王伐公孫淵徙豐人於益縣謂之南豐城一云南豐城在縣西二十里亦曰豐城又卷三十七北豐城在瀋陽中衛西北後漢末公孫度置城於此謂之豐城司馬懿伐遼東豐人南徙青齊其畱者曰北豐宋元嘉十五年北燕主馮弘奔高麗至遼東高麗處之平郭旣而徙之北豐尋殺之新汶無攷

夏四月

宋書天文志正始元年四月戊午月犯昴東頭第一星十月庚寅月又犯昴北第四星占曰犯昴胡不安二年六月鮮卑阿妙兒等寇西方敦煌太守王延斬之并二千餘級三年又

斬鮮卑大帥及千餘級

秋七月

宋書五行志正始元年七月戊申朔日有蝕之

八月

晉書天文志正始元年十月乙酉彗星見西方在尾長二丈拂牽牛犯太白十一月甲子進犯羽林占曰尾爲燕又爲吳牛亦吳越之分太白爲上將羽林中軍兵爲吳越有喪中軍兵動二年五月吳遣三將寇邊吳太子登卒六月宣帝討諸葛恪三年太尉滿寵薨

使太常以太牢祭孔子於辟雍以顏淵配

宋書禮志齊王每講經使太常釋奠先聖先師於辟雍弗躬

親也

注然等聞之乃夜遁追至三洲口

水經沔水注襄陽城東有東白沙白沙北有三洲三洲東北有宛口卽清水所入也方輿紀要卷七十九白河在襄陽府東北十里其入漢之處名三洲口

太尉滿寵薨

宋天文志正始二年九月癸酉月犯輿鬼西北星三年二月丁未又犯西南星占曰有錢令大臣憂三年三月太尉滿寵薨四年正月帝加元服賜羣臣錢各有差

三月

晉書宣帝紀正始三年三月奏穿廣漕渠引河入汴既東南

諸陂始大佃於淮北又宋書五行志正始三年四月戊戌朔

日有蝕之

此紀
失載

四年春正月帝加元服

宋書禮志魏天子冠一加其說曰士禮三加加有成也至於天子諸侯無加數之文者將以踐阼臨民尊極德備豈得復與士同此言非也夫以聖人之才猶三十而立況十二之年未及志學便謂德成無所勸勉非理實也魏氏太子再加皇子三公世子乃三加孫毓以爲一加再加皆非也

夏四月乙卯立皇后甄氏

宋書禮志魏齊王立皇后甄氏其儀不存晉太康八年尙書朱整議魏氏故事王娶妃公主嫁之禮天子諸侯以皮馬爲

庭實天子加以穀珪諸侯加以大璋漢高后制聘后黃金二百斤馬十二匹夫人金五十斤馬四匹魏聘后王娶妃公主嫁之禮用絹百九十四匹太始十年將聘拜三夫人九嬪詔依魏氏故事於是臨軒使使持節兼太常拜夫人兼御史中丞拜九嬪

五年春二月詔大將軍曹爽率眾征蜀

晉書天文志正始四年十月十一月再犯井鉞是月宣帝討諸葛恪恪棄城走五年二月曹爽征蜀

賜太傅大將軍及侍講者各有差

晉書扶風王駿傳駿字子臧幼聰慧年五六歲能書疏諷誦經籍魏景初中封平陽亭侯齊王芳立駿年八歲爲散騎常

侍侍講焉

九月鮮卑內附置遼東屬國立昌黎縣以居之

水經大遼水注白狼水又東北逕昌黎縣故城西漢書地理志曰交黎也東部都尉治應劭曰今昌黎一清案續國志無昌黎縣晉志云魏置今以仲瑗之言證之則知東京之季已立是縣旋廢而魏復立耳

冬十一月癸卯

宋書天文志正始五年十一月癸巳填星犯亢距心占曰諸侯有失國者嘉平元年曹爽兄弟誅

六年春二月

宋書五行志正始六年四月壬子日有蝕之十月戊寅朔又

日有蝕之

本紀俱失載

丁卯安南郡地震

晉書五行志是時曹爽專政遷太后於永寧宮太后與帝相泣而別連年地震是其應也

秋八月

宋書天文志正始七年七月丁丑月犯左角占曰天下有兵將軍死乙亥熒惑犯畢距星占曰有邊兵一日刑罰用嘉平元年曹爽等誅三年王凌又誅

冬十二月講禮記通

何云帝卽位五年凡通三經自八年以來頗事遊燕繼以君臣相猜學荒而位亦替矣

注習鑿齒漢晉春秋曰是年吳將朱然入祖中

方輿紀要卷七十五沮本作睢左傳哀六年楚子所謂江漢
睢漳者也後從沮又譌爲祖讀曰祖今襄陽府以南沮水左
右地皆曰沮中亦謂之祖中後漢建武二十三年南郡蠻反
劉尚討破之杜佑曰潕山蠻也潕亦作祖卽祖中蠻矣襄陽
記祖中在上黃界去襄陽一百五十里魏時夷王梅敷兄弟
部曲萬餘屯此分布在中廬宜城西山鄢沔二谷中土地平
曠宜桑麻有水陸良田郡縣志南漳縣東北一百八里有祖
山

八年春二月朔日有蝕之

宋書五行志晉書天文志是庚午朔又云是時曹爽專政丁

謚鄧颺等轉改法度會日食之變詔羣臣問得失蔣濟上疏
曰昔大舜佐治戒在比周周公輔政慎於其朋齊侯問災晏
子對以布惠魯君問異臧孫荅以緩役塞變應天乃實人事
濟旨譬甚切而君臣不悟終至敗亡

夏五月分河東之汾北十縣爲平陽郡

漢書地理志河東郡平陽注應劭曰堯都也在平河之陽
尚書何晏奏曰善爲國者必先治其身治其身者慎其所習
李云晏之言自可傳緬惟曹爽何鄧之獄益亦懿昭勢成之
後而錄其瑕甚其罪當日是非之實未必爾也何云史家於
平叔等既附見曹爽傳不能爲之平反特錄此奏使百世下
因其言而知其人不欲盡沒其實於異同之口耳

冬十二月散騎常侍諫議大夫孔晏又奏曰

續百官志諫議大夫六百石注胡廣曰武帝元狩五年置諫大夫世祖中興以爲諫議大夫漢官曰三十人何云此晏字衍孔又字元儁見第十六卷注中因下統言晏又而譌也

秋九月以車騎將軍王淩爲司空冬十月大風發屋折樹

宋晉五行志正始九年十一月大風數十日發屋折樹十二月戊午晦尤甚動太極東閣嘉平元年正月壬辰朔西北大風發屋折樹木昏塵蔽天此大臣執政之憂也後踰旬而曹爽等誅滅一清案正月朔是壬辰則十二月晦當作辛卯又宋晉五行志正始中中山王周南爲襄邑長有鼠從穴出語曰王周南爾以某日死周南不應鼠還穴後至期更冠幘阜

衣出語曰周南汝日中死又不應鼠復入穴斯須臾更出語如向日適欲日中鼠入復出出還入轉更數語如前日適中鼠曰周南汝不應我復何道言絕顛蹶而死卽失衣冠取視俱如常鼠班固說此黃祥也時曹爽專政競爲比周故鼠作變

車駕謁高平陵

宋書五行志正始九年正月乙未朔日有蝕之又晉書天文志正始九年正月辛亥月犯亢南星占曰兵起軍將死七月癸丑填星犯樞閉占曰王者不宜出宮下殿嘉平元年車駕謁陵宣帝奏誅曹爽等天子野宿於是失勢

注孫盛魏世籍曰高平陵在洛水南大石山去洛城九十里寰

宇記卷三大石山一名萬安山在洛城縣西南四十五里

魏武樂府城南篇云南上大石山卽此山也

太傅司馬宣王奏免大將軍曹爽

晉書五行志明帝太和中京師歌兒鈴曹子其唱曰其奈汝曹何此詩妖也其後曹爽見誅曹氏遂廢

又尙書丁謐鄧颺何晏司隸校尉畢軌荊州刺史李勝大司農桓範皆與爽通姦謀夷三族語在爽傳

晉書天文志正始六年八月戊午彗星見七星長二尺色白進至張積二十三日滅七年十一月癸亥又見軫長一尺積百五十六日滅九年三月又見昂長六尺色青白芒西南指七月又見翼長二尺進至軫積四十二日滅占曰七星張爲

周分野翼軫爲楚昴爲趙魏藝所以除舊布新主兵喪也嘉平元年宣帝誅曹爽兄弟及其黨與皆夷三族京師嚴兵三年誅楚王彪又龔王淩於淮南淮南東楚也魏諸王子幽於鄴

冬十月

宋書天文志嘉平二年十月丙申月犯輿鬼占曰國有憂一曰大臣憂晉志作十二月

三年春正月荊州刺史王基新城太守陳泰攻吳

何云陳少章云陳泰是州泰之誤元伯本傳具載前後歷官未嘗典郡又嘉平中方代郭淮爲雍州刺史安得與基同建破吳之功州泰事跡附見鄧艾傳後爲新城太守見注中

二月致南郡之夷陵縣以居降附

致當作置南郡夷陵本漢舊縣魏武平荊州置臨江郡於此
壁敗歸地入於蜀先主改曰宜都章武元年獠亭之後地又
爲吳陸遜所取今此所置蓋與吳對境而各立名耳

丙午閒太尉王淩謀廢帝立楚王彪太傅司馬宣王東征淩五
月甲寅淩自殺六月彪賜死

宋書天文志嘉平元年六月壬戌太白犯東井距星二年三
月己未又犯占曰國失政大臣爲亂四月辛巳太白犯輿鬼
占曰大臣誅一曰兵起三年七月王淩與楚王彪有謀皆伏
誅人主遂卑一清案五月淩自殺六月彪賜死志云七月誤
秋七月壬戌皇后甄氏崩

宋書天文志四月戊寅月犯東井占曰軍將死一曰國有憂
五月王淩楚王彪等誅七月皇后甄氏崩又曰五月甲寅月
犯亢距星占曰將軍死一曰爲兵是月王淩誅四年三月吳
將朱異爲寇鎮東將軍諸葛誕破走之又曰七月己巳月犯
輿鬼九月乙巳又犯占曰國有憂正元元年李豐等誅皇后
張氏廢九月帝廢爲齊王

以衛將軍司馬景王爲撫軍大將軍錄尚書事

續百官志每帝初卽位輒置太傅錄尚書事晉書職官志錄
尚書事位上公在三公上魏晉以後公卿權重者爲之

十一月

宋書天文志十月癸未熒惑犯亢南星占曰大臣有亂正元

元年二月李豐等謀亂誅晉書天文志十一月癸亥有星孛於營室西行積九十日滅占曰有兵喪室爲後宮後宮且有亂

十二月以光祿勳鄭沖爲司空

晉書沖傳字文和滎陽開封人清恬寡欲耽玩經史魏文帝爲太子命爲文學累遷尚書郎出補陳畱太守大將軍曹爽引爲從事中郎轉散騎常侍光祿勳嘉平三年拜司空及高貴鄉公講尚書沖執經親授與侍中鄭小同俱被賞賜俄轉司徒常道鄉公卽位拜太保位在三司之上封壽光侯沖雖位階台輔而不預世事及魏帝告禪使沖奉策武帝踐阼拜太傅進爵爲公泰始九年致仕明年薨謚曰成初沖與孫邕

曹義荀顗何晏共集論語諸家訓注之名曰論語集解成奏
魏朝於今傳焉

以撫軍大將軍司馬景王爲大將軍

宋書百官志漢東京大將軍自爲官位在三司上魏明帝青
龍三年晉宣帝自大將軍爲太尉然則大將軍在三司下矣
其後又在三司上晉景帝爲大將軍而景帝叔父孚爲太尉
奏改大將軍在太尉下後還復舊晉書職官志大將軍古官
也爲之者皆擅朝權景帝爲大將軍亦受非常之任

二月

晉書天文志嘉平四年二月丁酉彗星見西方在胃長五六
丈色白芒南指貫參積二十日滅

夏五月魚二見於武庫屋上

宋書五行志此魚孽也王肅曰魚生於淵而亢於屋介鱗之物失其所也邊將其殆有棄甲之變乎後果有東關之敗干寶又以爲高貴卿公兵禍之應二說皆與班固旨同

冬十一月

晉書天文志嘉平四年十一月丁未月犯鬼積尸

注是歲雍州刺史陳泰求敕并州并力討恪

何氏從宋本恪字改胡

五月

宋書天文志嘉平五年六月庚辰月犯箕占曰將軍死正元元年正月鎮東將軍母邱儉反兵敗死又六月戊午太白犯

角占曰羣臣謀不成正元元年李豐等謀泄悉誅

秋七月

晉書天文志嘉平五年七月月犯井鉞丙午月又犯鬼西北
星占曰國有憂正元元年李豐等誅蜀將姜維攻隴西車騎
將軍郭淮討破之

注又遷安豐太守

漢書地理志安豐安風俱屬六安國續郡國志屬廬江方輿
紀要卷二十一魏志安風郡治安風縣今壽州霍邱縣西南
二十里有安風城

八月

宋書天文志嘉平五年十一月癸酉月犯東井距星占曰軍

將死至六年正月鎮東將軍豫州刺史母邱儉前將軍揚州
刺史文欽反被誅又曰十一月彗星見軫長五丈在太微左
執法西東南指積百九十日滅正元元年二月李豐豐弟兖
州刺史翼后父光祿大夫張緝等謀亂皆誅皇后亦廢九月
帝廢爲齊王高貴鄉公代立一清案前四年二月丁酉彗見
西方在胃胃兖州之分故史氏以李豐兄弟當之然此年見
軫軫楚分也其應在二年正月母邱文欽之事乎淮南東楚
也又月犯東井距星之應宋志作至六年晉志作正元元年
並誤當作正元二年

子襲爵加拜奉車都尉

續百官志奉車都尉比二千石掌御乘輿車

自帝卽位至於是歲郡國縣道多所置省俄或還復不可勝紀
晉書荀勗傳魏太和中遣王人四出減天下吏員正始中亦
并合郡縣此省吏也水經河水注柏谷水出弘農縣南石隄
山山下有石隄祠銘云魏甘露四年散騎常侍征南將軍豫
州刺史領弘農太守南平公之所經建也魏時弘農屬司隸
不屬豫州豈所謂置省復還者耶石銘如是足以相證

注時安東將軍司馬文王鎮許昌徵還擊維

宋書百官志安東安南安西安北四將軍黃初太和中置晉
書文帝紀姜維寇隴右楊聲欲改狄道以帝行征西將軍次
長安雍州刺史陳泰欲先賊據狄道帝曰姜維攻羌收其質
任聚穀作邸閣訖而復轉行至此正欲了塞外諸羌爲後年

之資百若實何狄道安冒宣露令外人知今揚聲言出此欲歸也維果燒營而去會新平羌胡叛帝擊破之遂耀兵靈州北虜震懼叛者悉降

注至京師帝於平樂觀以臨軍

後漢書靈帝紀注平樂觀在洛陽城西

注卽出允爲鎮北將軍

宋書百官志鎮北黃初太和中置

迎六宮家人畱止內房毀人倫之敘亂男女之節恭孝日虧悖傲滋甚不可以承天緒奉宗廟

何云芳臨御數載非若昌邑始徵若果君德有闕播惡於眾師何難執以爲辭今稱太后之令發牀第之私有以知其爲

誣矣

注於是乃與羣臣共爲奏永寧宮曰

明元郭后傳齊王卽位尊爲皇太后稱永寧宮

注司徒萬歲亭侯臣柔司空文陽亭侯臣沖

柔高柔沖鄭沖

注光祿大夫關内侯臣邕太常臣晏

邕孫邕晉書任愷父吳爲魏太常晏疑吳字之誤

注衛尉昌邑侯臣偉太僕臣疑廷尉定陵侯臣繁大鴻臚臣芝

大司農臣祥

偉滿寵子疑

毓鍾毓譌爲繁芝魯芝祥王祥

注少府臣褒永寧衛尉臣禎永寧太僕臣閎大長秋臣模

宋書百官志太后三卿各一人應氏漢官曰衛尉少府秦官太僕漢成帝置皆隨太后宮爲號在正卿上無太后乃闕魏改漢制在九卿下大長秋皇后卿也有后則置無則省一清案禎疑是何禎又邴原傳永寧太僕張閭字子臺東郡人此閭乃闕之誤

注司隸校尉潁昌侯臣曾河南尹蘭陵侯臣肅城門校尉臣慮中護軍永安亭侯臣望武衛將軍安壽亭侯臣演

續百官志河南尹一人主京都特奉朝請秩中二千石城門校尉一人比二千石掌雒陽城門十二所一清案曾何曾肅王肅望司馬望演曹純子

注中堅將軍平原侯臣德中壘將軍昌武亭侯臣廙屯騎校尉

關內侯臣陔步兵校尉臨晉侯臣建

司馬懿奏曹爽罪狀云破壞諸營盡據禁兵謂毀中堅中興
二營以屬中領軍也今此復有二將軍之號益復置又宋書
百官志文帝卽魏王位始置領軍主五校中壘武衛三營五
校有屯騎德郭德卽爲甄氏後者襲公主爵爲平原侯司馬
郎封昌武亭侯子遺嗣遺廙聲相近陔武陔建郭建

注射聲校尉安陽鄉侯臣溫

溫甄溫文昭甄后傳云父逸以中山魏昌之安城鄉千戶追
封適孫像襲爵像薨子暢嗣又封暢弟溫韡爲列侯裴注
引晉諸公贊曰咸熙初封溫本國侯領射聲校尉似是時暢
旣失爵溫附司馬氏故得還封本國以支庶而奪文宗又文

德郭后傳云后蚤喪兄弟以從兄表繼后父永後封表安陽亭侯進爵鄉侯又進爵觀津侯甄氏本封始於安城不應冒郭氏安陽之號抑或表旣進封觀津而以安陽鄉封溫乎然云本國侯則故是安城而非安陽也疑陽字是城字之誤

注侍中臣小同臣顗臣鄴博平侯臣表侍中中書監安陽亭侯臣誕散騎常侍臣瓌

小同鄭小同顗荀顗鄴趙咨子表華表華歆子誕韋誕瓌司馬瓌

注關内侯臣芝尙書僕射光祿大夫高樂亭侯臣毓尙書關内侯臣觀臣嘏長合鄉侯臣亮臣贊臣賽中書令臣康御史中丞臣鈐博士臣範臣俊

芝郭芝也明元郭后傳云從父芝遷散騎常侍長水校尉封列侯芝與上臣壞臣儀皆官散騎常侍而芝自有封爵故以關內侯別之此人卽司馬師遣之白太后廢帝者毓盧毓觀王觀嘏傳亮袁亮贊崔贊騫陳騫康裴康峻庾峻

注清商令令狐景

清商殿名令蓋主殿之官宋書五行志太和五年五月清商殿災事應在明悼毛后則知殿爲王后所居

注太后遭合陽君喪

據明元郭后傳當作邵陽

是日遷居別宮

刀劒錄齊王芳以正始六年鑄一劒常服之無故自失但有

空匣如故後有禪代之事兆如於此尋爲司馬氏所廢晉隱
逸傳范粲字承明陳畱外黃人漢萊蕪長丹之孫也爲太宰
中郎齊王芳被廢遷金墉城粲素服拜送哀動左右時景帝
輔政召羣官會議粲又不到朝廷以其時望優容之粲又稱
疾閤門不出因佯狂不言寢所乘車足不履地子孫恆侍左
右至有婚宦大事輒密諮焉合者則色無變不合則眠寢不
安妻子以此知其旨以太康六年卒時年八十四不言三十
六載終於所寢之車

營齊王宮於河內重門

水經清水注重門城齊王芳爲司馬師廢之宮於此城在
縣故城西北二十里方輿紀要卷四十九城在河南輝縣北

二十里

高貴鄉公髦

寰宇記卷十一潁州萬壽縣本汝陰縣百尺鎮也有高鄉郭在縣南七里古老云魏高貴鄉公所築

十月己丑公至於玄武館

方輿紀要卷四十八玄武館在北邙之尾直故洛城北亦見辛毗傳

大赦改元減乘輿服御後宮用度及罷尙方御府百工技巧靡麗無益之物

漢書百官志公卿表尙方御府屬少府續志尙方令一人六百石掌上工作御刀劍諸好器物御府令一人六百石宦

者典官婢作中衣服及補浣之屬二官各有所司此言尙方御府統爲掌內府製造之事非有分也

正元元年冬十月

晉書天文志正元元年十一月白氣出南斗側廣數丈長竟天王肅曰蚩尤之旗也東南其有亂乎二年正月有彗星見於吳楚分西北竟天鎮東大將軍毋邱儉等據淮南叛景帝討平之案占蚩尤旗見王者征伐四方自後又征淮南平巴蜀是歲吳主孫亮五鳳元年也斗牛吳越分案古吳有兵喪除舊布新之象也太平三年孫綝盛兵園宮廢亮爲會稽王故國志又書於吳也淮南江東同揚州地於時變見吳楚之分則魏之淮南多與吳同災是以毋邱儉以亭爲己應遂起

兵而敗後三年卽魏甘露二年諸葛誕又反淮南吳遣將救之及城陷誕眾與吳兵死沒各數萬人猶前長星之應也一清案晉志以元年十一月二年正月皆有白氣竟天之祥攷之宋書天文志只是元年十一月一見蓋脩晉史者因下斗牛吳越之分誤以元年十一月爲南斗側二年正月爲斗牛分校宋志多一南字而不知其非也當以宋志爲密

二年春正月乙丑鎮東將軍卬儉揚州刺史文欽反戊戌大將軍司馬景王征之

宋書五行志正元二年正月戊戌大風晦暝行者皆頓伏近夜妖也時晉景王討卬卬儉是日始發

閏月己亥破欽於樂嘉

兩漢志無樂嘉縣顧祖禹曰卽漢志汝南郡之博陽王莽更名樂嘉者也後漢省今本漢書嘉作家蓋誤字

甲辰安風淮津都尉斬儉

淮字衍安風津見母邱儉傳

注溥鄱陽內史

漢書地理志豫章郡鄱陽縣有鄱水續志注是安十五年孫權分立鄱陽郡治縣

二月丁巳

宋書天文志正元二年二月戊午熒惑犯東井北轅西頭第一星占曰羣臣有家坐罪者甘露元年諸葛誕族滅

斬吳左將軍畱贊

孫峻傳注引書作左護軍

三月

宋書禮志正元二年三月朔太史奏日蝕而不蝕晉文王時
爲大將軍大推史官不驗之負史官答曰合朔之時或有日
掩月或有月掩日月掩日則蔽障日體使光景有虧故謂之
日蝕日掩月則日於月上過謂之陰不侵陽雖交無變日月
相掩必食之理無術以知是以嘗禘郊社日蝕則接祭是亦
前代史官不能審蝕也自漢故事以爲日蝕必當於交每至
其時申警百官以備日變故甲寅詔有備蝕之制無攷負之
法古來黃帝顓頊夏殷周魯六麻皆無推日蝕法但有攷課
疏密而已負坐之條由本無術可課亦司事之罪乃止

八月辛亥蜀大將軍姜維寇狄道

兩漢志隴西郡狄道

雍州刺史王經與戰洮西經大敗

方輿紀要卷二雍州治長安領郡六曰京兆馮翊扶風安定
北地皆故郡也曰新平魏武分扶風置治漆縣晉書地理志
初三輔屬司隸獻帝改置雍州自三輔距西域皆屬焉魏析
爲涼秦二州而雍州不改何云自師昭秉政與一方對敵東
關洮西喪師最甚

辛未以長水校尉鄧艾行安西將軍

宋書百官志魚豢曰四安黃初太和中置一清案志旣云漢
末陶謙爲安東段熲爲安西則不應云四安魏置也或安南

安北至魏始全耳

其令所在郡典農及安撫夷二護軍

宋書百官志魏晉有雜號護軍如將軍

青龍見軹縣井中

兩漢志河內郡軹

注舊章不行

何云行疑當作愆

注懼於所論

何云宋本論作諦

易博士淳于俊對曰

漢書百官志公卿表博士秦官掌通古今秩比六百石武帝

建元五年初置五經博士宋書百官志魏置十九人不知掌何經

帝問曰鄭玄云稽古同天言堯同於天也王肅云堯順攷古道而行之二義不同何者爲是博士庾峻對曰先儒所執各有乖異臣不足以定之然洪範稱三人占從二人之言賈馬及肅皆以爲順攷古道以洪範言之肅義爲長

尙書正義曰鄭玄信緯訓稽爲同訓古爲天言能順天而行之與之同功論語稱惟堯則天詩美文王順帝之則然則聖人之道莫不同天合德豈待同天之語然後得同之哉書爲世教當因之人事以人繫天於義無取且古之爲天經無此訓高貴鄉公皆以鄭爲長非篤論也晉書庾峻傳字山甫潁

川鄆陵人好學有才思太常鄭袤舉爲博士時重莊老而輕經史峻懼雅道凌遲乃潛心儒典屬高貴鄉公幸太學問尙書義於峻峻援引師說發明經旨申暢疑滯對荅詳悉遷祕書丞

注帝集載帝自敘始生禎祥曰

隋書經籍志梁有高貴鄉公集四卷亡又有春秋左氏傳音三卷亡一清案經典釋文莊二年梁滌引高貴鄉公音側嫁反則唐人猶或及見之矣

注傅暢晉諸公贊曰

隋書經籍志晉諸公讚二十一卷晉祕書監傅暢撰

注以望在外特給追鋒車

晉書輿服志追鋒車去小平蓋加通幟如輅車駕二追鋒之名蓋取迅速也施於戎陣之間是爲傳乘

五月鄴及上谷並言甘露降

宋書符瑞志谷作洛

乙丑青龍見元城縣界井中

續郡國志魏郡元城

秋七月己卯

晉書天文志甘露元年七月乙卯癸惑犯東井鉞星壬戌月又犯鉞星

癸未安西將軍鄧艾大破蜀大將姜維於上邽

續郡國志漢陽郡上邽故屬隴西

八月庚午

宋書天文志甘露元年八月辛亥月犯箕

九月

宋書天文志九月壬辰太白犯南斗吳志所書也占曰太白犯斗國有兵大臣有反者其明年諸葛誕反又明年孫琳廢孫亮吳魏並有兵事也九月丁巳月犯東井占曰軍將死二年諸葛誕誅

二年春二月青龍見溫縣井中

兩漢志河內郡溫

夏四月癸卯詔曰立菟郡高顯縣吏民反叛

續郡國志立菟郡高顯故屬遼東

丁丑詔曰諸葛誕造爲凶亂盪覆揚州昔黥布逆叛漢祖親戎
隗囂違戾光武西伐及烈祖明皇帝躬征吳蜀皆所以奮揚赫
斯震耀威武也今宜皇太后與朕暫共臨戎速定醜虜時宣東
夏

晉書文帝紀諸葛誕以淮南作亂議者請速代之帝曰誕以
母邱儉輕疾傾覆今必外連吳寇此爲變大而遲吾當與四
方同力以全勝制之乃表曰昔黥布叛逆漢祖親征隗囂違
戾光武西伐烈祖明皇帝乘輿仍出皆所以奮揚赫斯震耀
威武也陛下宜暫臨戎使將士得憑天威今諸軍可五十萬
以眾擊寡蔑不克矣秋七月奉天子及皇太后東征徵兵青
齊荆豫分取關中遊軍皆會淮北師次於項假廷尉何禎節

使淮南宣慰將士申明逆順示以誅賞

六月乙巳

宋天文志甘露二年六月己酉月犯心中中央大星景元元年

五月高貴鄉公敗

甲子詔曰今車駕駐項

兩漢志汝南郡項

秋八月

宋天文志八月壬子歲星犯井鉞九月庚寅又逆行乘鉞星

三年諸葛誕夷滅

九月

宋天文志十月丙寅太白犯亢距星占曰廷臣爲亂人君憂

景元元年有成濟之變十一月彗星見角色白占曰彗見兩角閒色白者軍起不戰邦有大喪景元元年高貴鄉公帥左右兵襲晉文王未交戰爲成濟所害

三年春

宋書五行志甘露三年正月自去秋至此月旱時晉文王圍諸葛誕眾出過時之應也初壽春秋夏常雨潦淹城而北旱踰年城陷乃大雨咸以爲天亡

三月

宋書天文志甘露三年庚子太白犯東井占曰國失政大臣爲亂是夜歲星又犯東井占曰兵起至景元元年高貴鄉公敗一清案晉志以爲二年三月

大將軍親總六戎營據邱頭

水經潁水注潁水東逕邱頭邱頭南枕水寰宇記卷十一武邱在潁州沈邱縣東六十里

注楚國先賢傳曰

隋書經籍志楚國先賢傳贊十二卷晉張方誤

注太祖聞之嗟歎良久不荊州復表門閭

不乃下字之譌

注漢晉春秋曰帝乞言於祥

晉書王祥傳祥南面几杖以師道自居天子北面乞言祥陳明王聖帝君臣政化之要以訓之聞者莫不砥礪

注小同年踰三十少有令質學綜五經

隋書經籍志梁有禮義四卷又鄭志十一卷鄭小同謚

注魏氏春秋曰小同諡司馬文王文王有密疏未之屏也如廁還謂之曰卿見吾疏乎對曰否文王猶疑而鵠之卒

後漢書鄭玄傳注引魏氏春秋文王曰寧我負卿無卿負我遂醢之

是歲青龍黃龍仍見頓邱冠軍陽夏縣界井中

漢書地理志東郡頓邱南陽郡冠軍淮陽國陽夏續郡國志陽夏屬陳國

四年春正月黃龍二見寧陵縣界井中

續郡國志梁國寧陵故屬陳留

注漢晉春秋曰是時龍仍見咸以爲吉祥帝曰龍者君德也上

不在天下不在田而數屈於井非嘉兆也乃作潛龍之詩以白
諷司見文王見而惡之

宋書五行志于寶曰自明帝終魏世青龍黃龍見者皆其主
廢興之應魏土運青木色而不勝于金黃得位青失位之象
也青龍多見君德國運內相剋伐也故高貴鄉公卒敗於兵
案劉向說龍貴象而囚井中諸侯將有幽執之禍魏世龍莫
不在井此居上者逼制之應高貴鄉公著潛龍詩卽此旨也
夏六月

宋書天文志甘露三年八月壬辰歲星犯輿鬼質星占曰斧
質用大臣誅甘露四年四月甲申又犯輿鬼東南星占曰鬼
東南星主兵木入鬼大臣誅景元元年高貴公敗殺尚書王

經晉書文帝紀甘露四年六月分荊州置二都督王基鎮新
野州泰鎮襄陽使石苞都督揚州陳騫都督豫州鍾毓都督
徐州宋鈞監青州諸軍事

秋七月

宋書五行志甘露四年七月戊子朔日有蝕之

冬十月丙寅

宋書天文志甘露四年十月丁丑客星見太微中輔東南行
厯軫宿積七日滅占曰有兵喪景元元年高貴鄉公被害
五年春正月朔日有蝕之

宋書五行志谷永說正朝尊者惡之京房占曰日蝕乙酉君
弱臣強司馬將兵反征其王五月有成濟之變又宋書天文

志景元元年二月月犯建星占曰五星犯建星大臣相譖是後鍾會鄧艾破蜀會譖艾遂皆夷滅一清案景元元年卽甘露五年蓋史氏追改之陳承祚獨於是年分別紀之非常之變不沒其實真良史也此本之春秋定公元年書法

五月己丑高貴鄉公卒年二十

史通直言篇云宣景開基之始曹馬構紛之際或列營渭曲見屈武侯或發仗雲臺取傷成濟陳壽王隱咸杜口而無言于寶虞預各栖毫而靡述至習鑿齒乃申以死葛走生達之說抽戈犯畢之言歷代厚誣一朝始雪攷斯人之書事蓋近古之遺直歟何云公羊傳曰公薨何以不地不忍言也書高鄉公卒其猶有良史之風歟抽戈犯蹕若直書之則反得以

歸獄於成濟今公卒之下詳載詔表則其實自著而昭之罪益無可逃所謂微而顯順而辨也史通之論蓋未識變例之旨一清案干寶直書成濟抽戈而移之鑿齒亦史通之誤

注帝乃出懷中版令投地曰行之決矣正使死何所懼況不必死邪

何云或以公是舉失之輕脫正使隱忍不發亦不過作陳畱王耳吾殊健其勇決也

注濟卽前刺帝刃於背

趙高以後復見此事王莽梁冀陰行鴆毒未有如此之顯者也

注世語曰王沈王業馳告文王尙書王經以正直不出因沈業

申意

何云正直謂當入直夏侯太初傳注引世語曰王業之出不
申經意一清案王經之死天變見於上晉書文帝紀亦云殺
尙書王經貳於我也可謂直筆

注魏氏春秋曰戊子夜帝自將冗從僕射李昭黃門從官焦伯
等

宋書百官志漢東京有中黃門冗從僕射非其職也魏世因
其名而置冗從僕射

注入白太后遂拔劔升輦

宋書禮志輦車周禮王后五路之卑者也后宮中從容所乘
非王車也漢制乘輿御之或使人輓或駕果下馬未知何代

去其輪魏晉御小出常乘馬亦多乘輿車輿車卽今之小輿散騎常侍王業國語曰業武陵人後爲晉中護軍

鍾會傳注有王業字長緒爲王粲族兄凱之子劉表之外孫粲子被誅文帝以業嗣粲疑卽其人也

沈業卽馳語大將軍得先嚴警

何云觀此二語沈業方爲司馬借以自解於天下當與成濟同戮矣

而此兒便將左右出雲龍門

方輿紀要卷四十八後漢南宮正門曰端門曹魏改建間闔門皆更名雲龍門一清案此則魏已有雲龍之稱矣

注百姓相聚而觀之曰是前日所殺天子也

詳味此言與故長安天子之語何異耶嗚呼

使使持節行中護軍中壘將軍司馬炎北迎常道鄉公璜嗣明
帝後

欲以小節虛文欺媚明元舉朝皆賊黨也何云以親疏論是
時丕後尙有人璜爲字之子則操後也當時惟昭之指昭穆
遠近莫敢議矣

注世說曰初青龍中石苞潛鐵於長安得見司馬宣王宣王知
焉後擢爲尙書郎歷青州刺史鎮東將軍

晉書石苞傳宣帝聞苞好色薄行以讓景帝則世語以爲受
知先帝似爲乖爽

其朝臣博議改易列奉

奉字乃奏字之譌

甘露二年封安次縣常道鄉公

續郡國志廣陽郡安次故屬勃海水經聖水注常道城故鄉亭也西去長安鄉城四十里

景元元年夏六月丙辰進大將司馬文王位爲相國封晉公增封二郡并前滿十加九錫之禮

晉書阮籍傳帝讓九錫公卿將勸進使籍爲其辭籍沈醉忘作臨詣府使取之見籍方據案醉眠使者以告籍便書案使寫之無所改竄辭甚清壯爲時所重

己未故漢獻帝夫人節薨帝臨於華林園使使持節追諡夫人爲獻穆皇后及葬車服制度皆如漢氏故事

何云少章云續漢書曹騰父名節太和詔書所稱處士君者也於獻穆爲高祖不應上犯祖諱必有一誤一清案處士之稱不見太和詔書見於宋書禮志然旣號爲處士則非閭宦矣與後漢書之曹節字業偉者是兩人但祖諱不避則不得其說耳何又云高貴鄉公弑崩之事獻穆猶親見之常道鄉公薨於晉太安元年則又晉室大亂趙王倫盜篡反正之後也噫

十一月

晉書文帝紀十一月吳吉陽督蕭慎以書詣鎮東將軍石苞僞降求迎帝知其詐也使苞外示迎之而內爲之備

準之義類則宴覲之族也

何云禮文王世子曰與族燕公與父兄齒又曰公與族燕則以齒而孝弟之道達矣又曰公族朝於內朝東面北上臣有貴者以齒所謂燕覲之敬宴燕通用族乃敬字之譌

十二月甲申黃龍見華陰縣井中

續郡國志弘農郡華陰故屬京兆

甲午以司隸校尉王祥爲司空

寰宇記卷三陳畱王奐合河南等五郡置司州十三州志云京司之州司隸校尉掌焉故曰司州

二年夏五月朔日有蝕之

宋書五行志是丁未朔又天文志四月熒惑入太微犯右執法占曰人主有大憂又大臣憂後四年鄧艾鍾會皆夷滅五

年帝遜位

三年春二月

宋書五行志景元三年三月己亥朔日有蝕之一清案晉書
天文志是十一月

夏四月遼東郡言肅慎國遣使重譯入貢獻其國弓三十張長
三尺五寸楛矢長一尺八寸石弩三百枚皮骨鐵雜鎧二十領
貂皮四百枚

肅慎國卽挹婁見東夷傳晉書四夷傳肅慎氏一名挹婁周
武王時獻其楛矢石弩逮於周公輔成王復遣使人賀爾後
千餘年雖秦漢之盛莫之致也及文帝作相魏景元末來貢
楛矢石弩弓甲貂皮之屬魏帝詔歸於相府賜其王襍雞錦

屬絲帛

冬十月

宋書五行志景元三年十月桃李華自高貴賜死之後晉文王深樹恩德事崇優緩此其應也又云十月京都大震晝晦此夜妖也魏見此妖晉有天下之應又天文志十一月壬寅彗星見亢色白長五丈轉北行積四十五日滅占爲兵喪一曰彗元亢天子失德四年鍾會鄧艾伐蜀克之會艾反亂皆誅魏迄天下

蜀大將姜維寇洮陽鎮西將軍鄧艾拒之破維於侯和維遁走方輿紀要卷六十臨潭城在陝西洮州衛西南七十里卽古洮陽城亦謂之曾城水經河水注引沙州記云強城東北三

百里有曾城城臨洮水者也侯和見姜維傳

夏五月

晉書天文志景元四年六月大流星二並如斗見西方分流南北光照地隆隆有聲案占之象二帥相背又分流南北之應鍾會既叛三軍憤怒隆隆有聲兵將怒之徵也

今使征西將軍鄧艾督帥諸軍趣甘松沓中

方輿紀要卷六十甘松城在洮州衛西南又有沓中戍胡氏曰沓中在諸羌中卽沙湟之地

雍州刺史諸葛緒督諸軍趣武督高樓

水經河水注高平川水又西北流逕東西二太婁故城北蓋卽高樓也亦曰他城方輿紀要卷五十八他樓城在平涼府

鎮原縣北百里晉太元十六年乞伏乾歸擊鮮卑部帥沒弈干沒弈干奔他樓城卽此高他磬之轉

又命鎮西將軍鍾會由駱谷伐蜀

晉書文帝紀將伐蜀乃謀眾曰自定壽春以來息後六年治兵繕甲以擬二虜略計取吳作戰船通水道當用千餘萬功此十萬人百數十日事也又南上下溼必生疾疫今宜先取蜀三年之後因巴蜀順流之勢水陸並進此滅虜定號吞韓并魏之勢計蜀戰士九萬居守成都及備他郡不下四萬然則餘眾不過五萬今絆姜維於沓中使不得東顧直指駱谷出其空虛之地以襲漢中彼若嬰城守險兵勢必散首尾離絕舉大眾以屠城散銳卒以略野劒閣不暇守險關頭不能

自存以劉禪之間而邊城外破士女內震其亡可知也於是徵四方之兵十八萬八月軍發洛陽大賚將士陳師誓眾將軍鄧敷謂蜀未可討帝斬以徇

冬十月

宋書天文志景元四年十月歲星守房占曰將相有憂一曰有大赦明年正月鄧艾鍾會並誅滅特赦益土咸熙二年秋又大赦

甲子行幸長安

何云郭太后在殯蓋墨經而出也

注及入顗遂拜而祥獨長揖王謂祥曰今日然後知君見顧之

重

姜云祥於晉魏篡試之際唯唯無所短長而靳此一拜所謂不能三年之喪總小功之察欲自附於汲長孺耶何云祥知拜之不可然其自處何以并在楊彪下也厥後馮道受郭威之拜復折而事周是以唯大節不可奪爲難一清案晉書祥傳高貴鄉公之弑朝臣舉哀祥號哭曰老臣無狀涕淚交流觀祥之所爲忠與其事後母之所爲孝一生都是假晉朝優容之者以其爲無用之物耳

丁亥封劉禪爲安樂公

此卽景初二年所置漁陽郡之安樂縣

夏五月庚申相國晉王奏復五等爵

宋書百官志左右二位將軍掌宿衛營兵漢魏不置晉文帝

爲相國相國府置中衛將軍驍騎將軍左右長史司馬從事
中郎四人主簿四人舍人十九人參軍二十一人參戰十一
人掾屬三十三人東曹掾屬各一人西曹掾屬一人戶曹掾一
人屬二人賊曹掾一人屬二人金曹掾屬各一人兵曹掾屬
各一人兵曹掾屬各一人騎兵掾二人屬一人車曹掾屬各
一人鎧曹掾屬各一人水曹掾屬各一人集曹掾屬各一人
法曹掾屬各一人奏曹掾屬各一人倉曹屬二人戎曹屬一
人馬曹屬一人媒曹屬一人合爲三十三人散屬九人凡四
十二人

八月庚寅命中撫軍司馬炎副貳相國事

魏置中護軍中領軍又有撫軍將軍此云中撫軍蓋特改舊

制以尊晉王之子耳尋自中撫軍爲撫軍大將軍

相國左司馬夏侯和騎士曹屬朱撫

騎士曹屬亦相國府官宋書百官志所謂散屬九人也

郎中羊琇

晉書外戚傳羊琇字稚舒景獻皇后之從父弟父耽官至太常一清案琇母卽辛憲英也琇入蜀事亦見辛毗傳注

孫休遣使鄧句

鄧句晉書陶璜傳作鄧荀卽所云察戰鄧荀擅調孔雀三千頭者句當是荀之譌

遣都尉唐譜等詣進乘縣

續郡國志牂牁郡進乘縣前漢書地理志作進桑

其以興爲使持節都督交州諸軍事南中大將軍封定安縣侯
南中大將軍是特建號非古制也續郡國志交阯郡定安一
清案漢志交趾有定安縣晉志同疑定安爲誤亦見蜀志張
嶷傳

紹本僞南陵督

方輿紀要卷二十七太平府繁昌縣西南有南陵戍下臨江
渚梁置南陵縣治赭圻城赭圻在縣西南十里江州東界盡
於南陵非今寧國府之南陵縣也

或兼給事黃門侍郎

宋書百官志給事黃門侍郎魏晉以來員四人秩六百石
是歲罷屯田官以均政役

何云法久弊生當時罷之必有以也當合同馬芝傳參觀之
安彌福祿縣名言嘉禾生

續郡國志酒泉郡福祿安彌故曰綏彌一清案漢志作祿福
而郡國志不言故名疑今本誤方輿紀要卷六十三綏彌城
在陝西肅州衛西福祿城在肅州衛東南五十里

二年春二月

宋書五行志咸熙二年二月太行山崩此魏亡之徵也其冬
晉有天下

夏四月南深澤縣言甘露降

續郡國志安平國南深澤故屬涿方輿紀要卷十二南深澤
城在北直祁州深澤縣東南五十七里十道志云漢置深澤

縣屬中山國今縣治是也又於漳沱河南置南深澤縣屬涿郡此城是也

五月

宋書天文志咸熙二年五月彗星見王良長丈餘色白東南指積十二日滅占曰王良天子御駟彗星埽之禪代之表除舊布新之象白色爲喪王良在東壁宿又并州之分也八月晉文王薨十二月帝遜位於晉

置旄頭雲罕

宋書禮志薛綜東京賦注以雲罕九游爲旌旗別名亦不辨其形案魏命晉王建天子旌旗置旄頭雲罕是知雲罕非旌旗也徐廣車服注以爲九游游車九乘雲罕疑是羣罕詩敘

曰齊侯田獵畢戈百姓苦之畢罕本施游獵遂爲行飾乎潘
岳藉田賦先敘五路九旗次言瓊鉞雲罕若罕爲旗則岳不
應頻句於九旗之下又以其物匹鉞戟宜是令畢綱明矣一
清案續輿服志注引徐廣曰武王克紂百夫荷罕旗以先驅
故薛綜以爲旌旗別名

是月襄武縣言有大人見三丈餘迹長三尺二寸白髮着黃單
衣黃巾

漢書地理志隴西郡襄武水經渭水注引魏志大人見下有
身長二字黃巾之黃減去無重文

征東大將軍石苞爲驃騎將軍

晉書石苞傳苞字仲容渤海南皮人代王基都督揚州諸軍

事進位征東大將軍俄遷驃騎將軍武帝踐阼遷大司馬進封樂陵郡公泰始八年薨諡曰武

乙亥葬晉文王

晉書石苞傳文帝崩賈充荀勗議葬禮未定苞時奔喪慟哭曰基業如此而以人臣終乎葬禮乃定一清案觀此則未禪位之先居然行天子之禮又與孟德不可同年而語矣

十二月壬戌天祿永終麻數在晉詔羣公卿士具儀設壇於南郊使使者奉皇帝璽綬冊禪位於晉嗣士如漢魏故事

宋書禮志咸熙二年十二月甲子使持節侍中太保鄭冲兼太尉司隸校尉李喜奉皇帝璽綬策書禪帝位於晉丙寅晉設壇場於南郊柴燎告類未有祖配其文曰皇帝臣炎敢用

玄牡明告於皇皇后帝魏帝稽協皇運紹天明命以命災曰
昔者唐堯禪位虞舜虞舜以禪禹邁德垂訓多歷年載暨漢
德既衰太祖武皇帝撥亂濟民扶翼劉氏又用受禪於漢粵
在魏室仍世多故幾於顛墜實賴有晉匡拯之德用獲保厥
肆祀弘濟於艱難此則晉之有大造於魏也誕維四方之民
罔不祇順開國建侯宣禮明刑廓清梁嶠苞懷揚越函夏興
仁八紘同軌遐邇馳義祥瑞屢臻天人協應無思不服肆予
憲章三后用集大命於茲災惟德不嗣辭不獲命於是羣公
卿士百辟庶僚黎獻陪隸暨於百蠻君長僉曰皇天鑒下求
民之瘼既有成命固非克讓所得距違天序不可以無統人
神不可以曠主災虔奉皇運畏天之威敢不欽承休命敬簡

元辰升壇受禪告類上帝以永答民望敷佑萬國惟明德是
饗晉書武帝紀策曰咨爾晉王我皇祖有虞氏誕膺靈運受
終於陶唐亦以命於有夏惟三后陟配於天而咸用光敷聖
德自茲厥後天又輯大命於漢火德既衰乃眷命我高祖方
軌虞夏四代之明顯我不敢知惟王乃祖乃父服膺明哲輔
亮我皇家勲德光於四海格爾上下神祇罔不克順地平天
成萬邦以乂應受上帝之命協皇極之中肆予一人祇承天
序以敬授爾位祿數實在爾躬允執其中天祿永終於戲王
其欽順天命率循訓典底綏四國用保天休無替我二皇之
弘烈一清案李喜晉書本傳作熹字季和上黨銅鞮人又晉
書五行志魏時起安世殿武帝後居之安世武帝字也拾遺

記魏禪晉之歲北闕下有白光如鳥雀狀飛翔去來有司聞奏羅之得一白燕以金爲樊置於宮中旬日不知所在論者云金德之瑞昔師曠時有白燕來巢檢瑞應圖果如所論師曠昔時人也古今之義相符焉

注魏世譜曰封帝爲陳畱王年五十八太安元年崩諡曰元皇帝

通典卷七十四晉武帝太始元年十二月遣太僕劉源告太廟封魏帝常道鄉公奐爲陳畱王詔曰明德昭融遠鑒天命欽象麻數用禪厥位敢咨詢故訓以敬授青土於東國永爲晉賓載天子旌旗乘五時副車行魏正朔郊祀天地禮樂制度皆如魏舊以承王顯祖之禋祀又詔王上書不稱臣答報

不爲詔一如賓禮晉書成帝咸和元年冬十月封魏武帝立
孫曹勰爲陳畱王以紹魏穆帝升平二年冬十月乙丑陳畱
王曹勰薨通典勰作廩宋書禮志大明四年九月有司奏陳
畱王曹虔季長兄虔嗣早卒季襲封之後生子銑以繼虔嗣
今依例應拜世子未詳應以銑爲世子爲應立次子錯右丞
徐爰議銑本長息宜還爲虔季世子詔如爰議

宿松羅忠濟初校

黟縣黃士陵覆校

陽湖吳朝寅再覆校